

太

函

集

太函集卷之六

新都汪道昆伯玉著

序七首

御史中丞張公平蠻序

夫治莫盛于唐虞而有苗以逆節著猥云干羽來格
其族類迄今存焉我國家用夏變夷廣聲教而寬
文法三楚百粵並建督府彈壓之其後酌緩急之宜
罷楚存粵自韓襄毅以嚴治粵功用乃興嘉靖初王
師入粵振歸旅以乘八寨破之師無留行僅僅底績
卒之兵端未弭屢厯執言其在中年島夷伺東南入

自吳及浙自浙及閩昔皆隩區節鉞之臣出矣粵故
與倭爲市其末中粵愈深加以山海淵藪乘亂爲虐
腹心之寇不暇爲謀一何棘也人言吳浙癰也毒自
外傳之閩其疽乎毒自中潰粵猶之癰也蓋與有生
爲始終雖有國醫鮮不狼顧及胡少保平吳平浙余
幸從譚襄敏平閩顧惟兩粵紛紛日不暇給東事急
則粵東置開府而督府西攝蒼梧西事急則粵西置
開府而督府東攝肇慶其西置則自殷開府始于時
有古田之征八寨包藏禍心託歸順以緩天討會露
師東粵開府督兵而東山海以次蕩平尋拜計相上

書言百粵底定不者惟羅滂臣且行其以俟代者及
凌司馬代督府羅滂遂平八寨肆爲無厭乘時蠕動
及司馬入叅贊壹如鄉者言羅滂伏誅不者惟八寨
裘而狐白羔袖何爲是在任事者圖之胥後舉及劉
司馬代督府而張中丞撫粵西八寨稱亂有徵罪在
無赦督撫上其狀請加兵 上以爲然第毋以徵發
擾境內于是徵兵十萬悉屬總兵王尚文主之請餉
五萬悉屬叅政彭文質主之分部則叅將李應祥倪
中化于嵩張榜爲四軍分地則三里忻城夷江上林
爲四哨分督則副使陳俊侯國治叅議姜忻李一迪

爲四監督府遣故叅將梁守愚振鐸從中軍進于是
爲期日自歲十二月辛卯迄于春三月壬寅胥命及
期鼓行並進賊黨殊死距守我師四面傳之旣奪據
畢登退保故穴乘勝而掃諸穴有亡命者悉搜之俘
馘萬四千五百八十二人殭尸三千餘衆蓋延袤五
百里諸部落悉平胡直指方按部紀功與班師會旣
多其以全取勝勒石而銘其功則又以比年有事於
南寔惟南國之士若韓公凌公張公並產吳會胡公
殷公汪公並產新都王國克生維周之楨皆此族也
昔在癸卯殷公凌公張公同舉南畿越三年則又偕

汪公同對公車令乃今勲伐並著不亦濟濟乎哉宥以鄉曲後生覩成功而愉快可知矣自昔有標功南紀者願乞一言當之不佞無良其何敢與二三大夫齒高皇帝由南國起宛在豐鎬豐沛之間從龍虎而奮風雲二三大夫其選也直指爲天子耳目擎擎體國而下中丞蓋深有概于中可與識者道爾夫事有似難而易者首事是也有似易而難者成事是也首事難矣上之慎慮而動下之熟慮而從譬之射然以虎視石者也少保之在吳在浙襄敏若不佞之在閩司徒之在古田在東粵皆是也成事無難矣然

而氣盛則驕驕則惰令煩則玩玩則偷上情下偷惡
用九仍慎終如始乃可及泉今督府中丞之弭粵西
皆是也葢爾八寨曾不足以當一隅亦猶稊米之塵
太倉毫末之厖馬體直頰而拾之爾夫復何難要以
盡萬國而舉什全誓將罷尉徹埃以相休息難之難
者也疇昔古田之役宿將藉王翦爲高談如必舉兵
非數十萬不可乃今發檄而徵十萬卒用七萬有奇
衆不勞矣昔般司徒獻捷譚襄敏顧不佞而言使吾
黨與司徒並驅卽制勝無讓獨軍興七萬足用殆非
吾兩人者能乃今請餉五萬卒用四萬而有贏餘財

不費矣不勞不費而獨成人所難成之功其斯無負
天子之力臣蓋社稷之伐也鄧林多材良者千尺崑
山多玉瑜者連城則中丞事在不佞爲樗櫟爲砮矟
其何敢與二三大夫齒

送太守徐公副山東臬序

吾郡故多良二千石宜莫如郢都徐公蓋自丁迄庚
歷三年有半其年春最計吏夏最程書及秋執秩以
聞則以新都守副山東臬蓋治兵東魯分道沂州云
檄至新都諸縣大夫若七校之士六邑之老更咸在
其始欣欣然相告也今天子下久任之令固非所

以遇非常卽得非常如君侯胡可久也旣又項項然相顧也 今天子下久任之令豈不畫一乎哉顧自我而失君侯非君侯之久而誰久也于是相率逋過不佞其將質輿論以繫去思不佞力疾應門諸父老先至其言曰吾郡百年以來故太守陶公稱首其後餘二十載得今君侯陶公獨稟沉潛卒用沉潛爲治迄今俗趨愈下不啻波流獄訟日煩爭鬪日起盜賊日斥困窮日益罄罄故其治利用高明視疇昔異今君侯高明者也不自用其高明頃之無情者革心不逞者斂手憤者釋佩虎者褫冠蓋不剛不柔卒歸乎

平康正直德之全也昔庚桑楚三穰畏壘其民尸而
祝之吾儕亦將祠事君侯右陶公而並祀願司馬碑
矣不佞敬諾次諸士至其言曰吾郡輔首善諸先達
蔚爲國華豈直都人士能郡大夫之教較著比年士
習弟靡間入多門正合則迂詭遇則捷將日非矣君
侯始至如太公望之鞠旅不誓而嚴久則如萬石君
之治家不言而化遲而又久則如七十子之服孔子
不戒而孚即範馳驅而失前禽多獲將至備乾豆登
明堂胥後命爾昔益州以講德頌刺史學士至今稱
之諸士亦將陳講德之緒言司馬序矣不佞敬諾其

後諸大夫至則曰昔人有言守令猶姑婦也勃谿者
難爲婦諍語者難爲姑即婦無良責在姑矣某等待
罪庶邑幸得姑事君侯君侯視庶邑若家人視庶邑
之民若家人子旣不以嘻嘻著愛尤不以嗃嗃著威
閑有家无祗悔其于母道無遺憾矣茲行者齊民有
祠學士有述則皆藉手司馬古之行者必有贈願抵
司馬之言不佞避席曰善乎諸大夫若諸文學諸父
老之言信矣夫朞月而可三年而成則聖者事君侯
之爲政三年爾豈必人人嫗拊之哉境內承順之若
姑主之若師帥尊而親之若王父奔走之若家人

此遵何德而畢得其心則精白先之耳昔史遷傳循吏不獨稱廉彼徒以循取近民廉取直已直已則不失已近民則不失民抑或廉而劇焉將不循矣概諸民所利賴與其劇也寧循廉不必循故循足多爾語曰貪夫殉財烈士殉名貪之去烈奚翅徑庭聲利入于其心其殉均也於陵細行豈不謂廉彼且汲汲乎廉士之名其欲奢矣是故人以不貪爲廉硜硜乎其小也吾以不欲爲廉皜皜乎其至也君侯矚然不滓諸古廉吏何加此之爲不貪則夫人多之矣至其不揣上指不瀆下交不市私恩不獵民譽去名如去利

終不以小庶自矜我儀圖之則不欲之云也聞之宋
儒無欲可以作聖無欲則明明則通無欲則公公則
溥非敢必其優爲也殆亦庶幾乎近之故先聲所溥
莫不祇承周澤所濡莫不胥化不令而大夫從士從
庶民從皆由此塗出也夫郡邑之附藩臬藩臬之附
臺省有如衆目之附紀綱列郡者列邑之積也列郡
積而爲監司爲方伯諸藩臬積而爲九列爲六官其
體貌愈益尊功用愈益易矣君侯發矚于列郡固將
游刃于監司方伯九列六官何以徵之徵諸其官屬
士庶同也乃今陶公都上卿據宗伯則其前茅君侯

且以招搖進矣諸大夫拜手宣言曰微司馬宜未得
君侯其勒之帛而載之前以當負弩不佞敬諾

送沈太史還朝序

沈太史首舉公車旋得 賜告先是都人士逖以期
會集宛雅從太史游太史三入新都傾都人士比在
告都人士各以其私億之太史習道家言得時則駕
乃今 明良在上資適逢時胡爲乎蓬累歸矣太史
良已乃始治行都人士喜相告也太史行乎哉景風
自南僊僊乎駕矣始發則陟天門遵牛渚石城雄踞
宗廟百官在焉信宿周旋此其一息也秭楊相屬宛

在江都府萬貨輳五方 縣官於是乎藏富方諸大
業不帝徑庭渡淮而泝黃河率由故道宣房底績夫
非帝力乎哉昔仲尼寓目呂梁頃且爲陸今茲懸水
如故寧無被髮之夫省赤帝子于沛宮維舟土囊之
口炎劉熄矣歌臺歸然獨存大風泱泱爰及東濟有
樓峙高墉之上爲太白樓異代同聲此焉再息沿九
河而趨碣石躡其遺宮當世不倡游言談天者批頰
退矣萬方與計偕至太史將有事南宮燕有崇臺得
臣而霸方斯蔑如也上林之賦相如擅場 聖主開
東觀以進詞臣雅頌由此其選是在太史太史行哉

吾黨守在一隅無能從裊風與俱往第程所歷區而分之分賦一區以授舟牧鼓枻遞進安用驪駒詩旣成則皆抱牘而卻步太史猶之乎希有也其鳴喈喈吾黨不足以當轂音奚其盈耳乃質諸太函氏第擇可者籍之太函氏卒業而言甚矣二三子之急太史也亦旣嚮風而應之矣詩有六義其一曰風風之爲言風也大塊噫氣是也唱有于喁和有小大琴瑟則萬竅並作旣濟則虛吹萬不同皆足以發故動萬物者莫疾乎風動以天也列國有風乃在閭巷婦子詩教宜不及此太師奚取焉彼其被于謠俗流于性情

殆亦天也非人也浸假而風爲政周萬竅而徇之若
必爲鍾呂爲簫韶卽終古而求一鳴曾不可得幸而
得一不幾于廢百矣乎如使太師所陳必關雎必麟
趾則三百皆其土苴耳曾可以慨諸二南是故以天聽
之則衆竅爲窾以人聽之則比竹爲工聽之以天天
耳也聽之以人里耳也太史之審樂則夔也審音則
曠也天耳其在斯乎二三子之稱詩也工則工拙則
拙不相掩矣太史泠然御扶搖而上二三子響應而
坐馳莫非聲也本於無聲莫非情也極于無情蓋地
籟之屬也要以天籟太史張之卽工拙何擇焉都人

士更進曰大哉風乎君子之德也太史殆將出而風
四方矣如之何其無擇邪太函氏曰不然有虞風動
稱至治者歸焉如必家稷契而人臯陶即三五並興
日亦不足舜之風也天德出寧于時人貌而天從欲
以治何以故無爲故也無爲則無心矣其諸聲無聲
情無情者與乃若察微眇于鵠鳴者必亂其聰離堅
白若懸寓者必屈其辯何以故挾有能居有所也有
能有所寧不卑卑今夫風虛而不屈動而愈出尚安
事能起于青蘋之末而莫窺其始極乎九萬里之上
而莫測其終尚安事所太史業已聞道蓬蓬然天行

斯時也 天子方鼓五絃以歌南風日幾幾望太史
太史操南音以往其斯以爲國風異日者觀俗而求
之新都則擊壤之歌在

送龍長君應詔郢都序

往不佞三仕楚歷名山大川山則大嶽爲極衡嶽爲
宗天嶽爲榮閭以二別川則瓚江漢而下匯七澤滄
三湘右洞庭左雲夢會于夏口東衆流而朝宗亭亭
乎浩浩乎峻極闕深蓋文明之域也昔在初載嚮熊
爲王者師左史倚相屈宋唐京之倫蔚爲國寶由茲
潤色帝業則楚材居多我 世祖肇迹郢中名世挺

出自厲山氏以降斯其盛與要以三楚世家無若武陵龍氏武陵于山爲峻谷于澤爲上游實生羣龍此焉窟宅頃自太守公入計不佞逆之襄陽司農公佐新都幸託宇下孝廉公起家戊午則不佞從列棘推轂之及司理君對公車奉三尺聽吾郡於是乎三世通家矣都人士謂司理君齒不逮洛陽而才無讓宣室凡諸逢掖莫不主臣司理君自言膺何能張楚有父兄在則楚之良膺直豚犬耳瓦礫耳先是司理君自楚而東之郡奉孝廉公行公居庭戶屢不交於内外斬斬如也比公歸楚趣長君代之長君則以三天

子都爲 高皇帝南輔士被首善斐然嚮風使襄得
經旬服觀人文卽實而往虛而歸庶幾望吾腹矣既
入郡斬斬一如孝廉公都人士傾慕長君無繇一上
竿牘獨醫吳時以問疾至長君折節下之則聚族而
叩醫吳得長君狀由是愈益傾慕顧終不獲自逆其
年有 詔賓興長君且歸楚都人士請埃出宿爲錢
卒固辭則相與計程期目送之楚時而彭澤時而湓
城時而黃岡時而赤壁時而夏汭時而蘭臺翹首而
西則帝時神臯渚宮澤國宛在寓目乃屬良史丁氏
子槃礴爲楚觀圖自桃源以迄蘭臺一瞬千里二三

風雅之士從而賦之將抵不佞爲先談竊比贈言之
義夫材之生也體天地繫國家兼此四者故全其曰
才難殆非虛語天之盛德氣莫王于南翼軫之間則
明都也楚得天矣嶽得三而瀆居二是爲隩區其得
地者殊也大明麗正 世祖中興多士斌斌生此王
國國其皆得楚也國不足楨乎乃若世業相承父子
兄弟具在其似續若弓冶其倡和若墳簞以此承家
家有造矣乃今律天運則楚人鈞也協地靈則楚人
鈞也享國步則楚人均也於稽世類若在伊洛若在
郿山合二姓而充一庭則羣龍首出彼其或推或輓

若在先登長君駕左廣而鼓之蓋其勁也且也士以
經術著什百無慮二三至若三世代興曾不能以萬
一與其世受不朽之業翩翩然與古爲徒曠百世而
一有焉幸矣長君世濟其美食舊維新斯其爲希有
也與哉卽楚產董董耳在易帝出乎震居乾之初時
潛而潛莫窺其朕陽主其進先見乎離是爲乾之同
人見龍之謂也萬物共覩尚安事潛長君奉三物而
賓有司潛而見矣由是而上太常涉當世凡有日者
咸利見之都人士胡然而汲汲也衆皆曰善長君不
忘南音久矣吾黨其爲楚歌退而負牆陳詩者逖進

不佞爲之並書諸策屬榜人歌之其一爲武陵之歌
歌曰灼灼者華武陵之曲碩人之居矣于灌木誰謂
漢廣方舟若何具曰予適弓旌則那其一爲衡嶽之
歌歌曰奕奕泰衡祝融偃僂陟自有虞銘于神禹百
靈輳至有待升中 聖主當陽用告秩宗其一爲洞
庭之歌歌曰決雲漢兮沃焦搏風力兮扶搖水嬉兮
蕩蕩天遊兮逍遙浴三光兮湛兩儀齧百粵兮吞九
疑鼓湘靈兮鳴瑟奏黃帝兮咸池其一爲大嶽之歌
歌曰玄君陟降躡紫微只壽宮千仞凌丹梯只白榆
周布捫虛危只龍駕帝服列僊隨只誰其登封肇

文祖只招搖在上赫神武只我欲樞兮升帝所只保
茲天子申及甫只其一爲雲夢之歌歌曰乘餘航
兮水濱汰天風兮揚舲鼓填填兮棹歌起朝杜蘅兮
暮荆杞躬秉耒兮沮洳代截流兮佃漁懷伊人兮天
末操一葦兮焉如其一爲夏汭之歌歌曰夏口兮泱
泱交流兮爲璋大小別兮內外方闔九關兮呵不祥
神樓峻兮睥睨黃鶴舉兮廻翔其一爲蘭臺之歌歌
曰楚之庭九儋具陳有臺斷斷有城有平賓於是乎
先升楚之瀝旣嘉且栗崇臺翼翼光風習習賓於是
乎撫席楚有嘉賓升歌鹿鳴雄風起兮青蘋臨高臺

兮披襟賓卒爵兮欣欣

送太平太守林使君遷浙江副使序

大江以南爲高皇帝甸服其股肱郡則太平張左
輔倚上游部使者行六郡而次太平猶之一都會也
合從則太平爲長列郡守相皆鴈行林使君守太平
于今五稔監大夫部使者通舉良二千石通首太平
列郡守相之造太平莫不交相下也則以使君外溫
內栗孚尹由衷其稱號曰玉吾美而不溢由其取友
也信故其獲上也深獲上深故其得民也洽政成而
最則其緒餘會所部監司以進秩行境內日望使君

且代及使君浙東之命下蓋亦兼兵巡事云列郡守
相相與言執秩于是乎不慮矣使君以聲教訖六郡
六郡以父母仰使君至習也藉令使君以監司留彼
中不失一觀察卽遷去此中不失一監司顧就列郡
而得監司至便也今則否矣執秩其將謂何使君聞
而避席曰材不材幸得奉教羣大夫不以守吏無良
罷惟茲跬步莫非寵靈於材過矣又何敢躡夷隅而
上之吾郡高君侯言古稱同官猶兄弟也吾黨二三
兄弟非直以邦交暱使君其三同起度支郎其一同
籍公車令諸相君率以臭味相合聲氣相從使君于

是乎先鳴九臯有遺音矣吾黨直啁啾耳無能矢音
以爲贈言如必文之以言固當徼惠司馬居有頃君
侯儼然以羣大夫之命命之不佞故嘗問俗於莆業
已得使君於故國比年太平之澤波及新都蓋至渥
矣則又從鄰國而得使君即言之無文其何敢距成
命昔在周禮牧以地得民故司徒曰地官其屬曰民
部六府三事則其任職居多往使君爲郎亟爲部尚
書主章奏擬其通達國體不啻賈生諸尚書郎率歛
衽而下之矣譬之四教爛於公宮比及有家於婦順
也何有是故政在養民五物九等財賦出入是已政

在教民三物十二教禮樂中和是已使君之政孳孳
務重民天境內故恃圩田會水大至隄且壞使君帥
諸官師父老躬禱于隄卒之堤不齧而田有秋境內
康食庶邑以賦納金者率皆由郡轉輸使君令筦庫
勿發其封第給文以往乃若樽節拊循不可僂指無
庸家賜人益其所養可知則其教民則新學宮有功
令程經藝辯官材五年以來教無不舉司徒之媿宮
室聯師儒皆是物也猶未也從頌以服無情精核以
懲不典咨課以達無告完繕以備非常司徒之屬有
訟則與有地治者聽之有比則舉比要而會之有職

事則舉鄉國都鄙而登之有訟則舉車甲而授之由是而奸慝不作瑕璽不生寧邦國擾萬民胥此也夫天之立君君之立牧凡以爲民夫旣以地得民亦將以民得天由是而藩臬由是而臺省要皆民治之大者也諸方伯分部必首浙江乃今使君觀察之區則惟金衢二郡自昔京師爲四方之極而監司則六郡繫之列郡守相之急使君有以也往不安筮爲邑乃在二郡之間及南北稱兵亦旣身帥故邑良家子以愼無敵斯時也戎馬不生邊人不聳雖有敵愼將安用之古人有言操刀必割則其習使然不佞過計而

欲爲之防餘十年所使君善養而民從善善教而民從方舉而措之凡所以塗無卻銷未萌者無用三尺爲也在昔括之亡命爲寇三入新都宛陵不備不虞恣其捆載幸而當事者出發兵以襲其後寇虐乃紓然則使君屹然居東亦將爲天府金湯耳先是三輔遷秩列郡故未有贈言有之則自今始即不佞無能爲役而羣大夫修和之悃不戒以孚夫有虞以和衷而亮天工成周以同心同德而大命集共和季世卒以匡周是皆以大同而爲和和羹是也世之雷同者異於是相摩則以市道相軋則以機心甚者鳴鼓揭

竿黨同伐異賤妨貴少陵長尤而效之居然以同爲和去千里矣畿輔首善羣大夫率以和德維風和而不同皆由此塗出也昔申甫承命而行吉甫作誦其一肆好其一穆如和之至也不佞昔嘗學禮旣秉周禮以諭使君記有之不能詩於禮謬不佞無以爲口實請事崧高之七章烝民之五章遂因君侯以復羣大夫且謝不敏

贈居士叔序

居士始成童從諸父兄賈浙有不合去而賈雲間學賈不成去而譚二氏方外或以禁方授居士所治疾

輒平或遺藥或遺金悉舉以餉方外吳僧大林多居士則逆居士主竹堂竹堂爲吳輿區四衆咸集居士不假擅越更治叢林十時從白入玄陰驗不死之藥人言居士爲此潭潭者其藥成邪居士搔首應之置勿辯旣而謂大藏直糟粕爾獨有味乎少林曹谿天台趙州黃蘗諸宗家言駁駁深入之無扞格顧善蘊藉恥高譚屬夫已氏睨竹堂不便居士居士則以受託大林不許彼爭益彊居士笑曰某子甲謂僕家竹堂邪僕第家虛空爾乃今縱不以人我而爭佛土終不以怖畏而貶莊嚴乃就林外治室一區莊嚴倍昔

且將去吳市故多鄉人賈訛言居士母已亡一旦遇
張甥市中言外王母亡恙居士有萬戶兄得居士狀
督甥趣居士歸萬戶且將爲居士婚居士不欲也孤
始事佛萬戶要居士質孤孤目居士曰使居士佛邪
卽父母無畱安事妻子時孤叔父在坐應聲曰如使
其未佛也則母在非妻子將安事之萬戶乃謀諸唐
太史孫婚居士孤入佐邦政萬戶終于家居士挾萬
戶子叩司馬門襲萬戶孤雅謂居士亦給方外候人
事爾安得無生居士亦謂毘師直獵內典以益多聞
焉能爲毘師有也孤調之曰居士之禪耳爲政居士

抗聲曰毘師之禪目爲政曰吾不著見曰吾不著聞
旣而相質曰有能廢口耳黜聰明吾黨與之友矣孤
則以楚僧大安居廬嶽嗣法門正宗居士乃齋三月
糧造廬嶽會大安爲孤築毘廬閣閣新成居浹旬反
都市孤問曰大安何狀居士答曰有如大安曰叔未
始得未曾有邪答曰無則不無有則不得孤旣得請
輒載居士歸會大安亦從廬嶽就孤樓居居士及仲
氏具在大安謂孤千秋里中食指累百者二柰何得
二三佛子邪于是諄諄督孤先登毋令濡尾孤苦難
而止乃謝大安居士作色曰伯病涉與卽得尺寸猶

賢豈必彼岸孤笑曰不彼岸則胥及溺耳即尺寸何爲孤夢頂骨化玉蟾蜍躍而辭去孤則曰爾何以去去我何之對曰從公學道者二十年乃今公不學道去之帝所自是而孤多病居士數以爲言孤曰固然公毋以五十步而笑百步先是居士歸養載百金裝進而爲壽高堂退而散諸兄嫂諸兄嫂以爲可繼也日幾幾望之旣婚裝且盡亟餽不至退有後言積十年子女長矣邑中良醫數相擊也居士之術不行于是無以爲家乃大困居士故善臥日高春不治養卽妻子齧齧餅無餘粟居士盱眙自若絕口無所干居

常適廣衆中向隅而求便坐廣衆未解終日不聞聲
其迂僻如此即居士兀兀終歲不患貧妻子待哺
者三人無所取給不得已而從故人賈都市面謁孤
而行孤復調之曰無亦妻子累叔邪抑叔累妻子也
居士笑曰不用伯言果及此累爾嗟乎使釋吾累而
後可入道猶之舍筏求梁梁非不安望洋何濟藉令
不釋累而往則五石之瓠可浮矣然非強有力者惡
能徑渡乎哉方外有言大隱隱廛市古之人或以漁
隱或以樵隱或以獵隱此皆一壺徑渡者之爲如必
棄妻子入山林是驅石而梁滄海者也然則居士殆

以賈隱胡不可哉嗟乎大安侘吾里得三人孤棄業
久矣仲氏亦將覩急流而勇退孰截狂瀾居士勉之
寧以賈隱禪毋以禪隱賈也

肇林贈言

吾聞邃古道一俗同周德下衰斯道裂矣六家戶列
釋無與焉彼其後至而先鳴難乎爲上吾儒爲政首
排擊之猥云以齋亂華無亦示人以不廣支遁惠遠
始通吾儒以彼其材僅得一當達者乃若拘儒曲士
惟墨守爲兢兢脫遇少林曹溪猶將不免迄于末法
張鵠以適穀中吾儒豈必命中能哉彼不用命故爾

余故詘釋氏不啻世儒旣緒其書輒改慮而與其進
蓋始而信旣而疑旣則厭之旣且憎之矣吾始遊其
藩彼效法象旣窺其室彼效法身執熱而飲之冰凌
人易爲德矣故信之信之者中人以上者也及吾求
無住心則貞常斷求無礙智則事理殺將叩善鳴誰
爲木舌乃知疇昔皆窾言也故疑疑之者又其上焉
者也其下伺簿門爲外府賦擅施爲正供虛往實歸
日亦不足問其出入所不敢知如是者五人而三夫
孰能不厭又其下者業不自白而緇矣衣不緇而赭矣
大都操有我熾無明非直以華亂華迺將蹂西裔而

亂之矣如是者五人而一故憎弗信而憎則吾望之
深也夫釋氏宗佛儒宗聖人朝事佛而夕倍之厭之
憎之誠是也儒生誦法孔子非詩書禮樂不談瞽宗
非不敕于叢林麗澤非不親于結衆幸而遇合廢若
弁髦如是者參居二焉又其甚也使釋氏執言以詰
吾黨其何說之辭要之後佛而生者無瞿曇後聖人
而作者無孔子少林曹溪則顏孟也支遁惠遠則左
史也苦行則躬行瑜伽則佔俾也孔顏千古希觀左
史代不一人第令得尚于躬行亦儒者事瞿曇尚矣
少林肇迹施及曹溪厥有支流皆其餘潤第令持戒

精進不倍師承蓋亦躬行之屬也往余東游而得荆
山則喜西游而得廬山則喜北遊而得陽山則益喜
夫喜也豈其以非道得我乎哉或以高談或以悟入
或以解脫故足多也其人已朽罕得其儕及余有所
厭憎人或究其退悔夫聖凡無擇匪夷所思辨異統
同譬諸刻畫類鶩猶云近似類狗較若不倫即吾無
所用明寧詎能一視而鈞喜之也攝山節公出吾故
郡說經供衆垂二十年四衆皈依名重都會法士如
慧以開士聞是春結肇林期禮梁王愷公遣開士爲
盟主與三人俱三人者爲一心爲無學爲無照皆公

上座弟子禮畢告歸攝山余未見節公竊喜得開士
持戒精進不倍師承則其人也開士之言曰西極化
人之居從虛立極本之則惟心造此爲肇基佛土莊
嚴亦曰淨土嚮此者爲實際背此者爲空華明公慎
所擇矣余應曰善乎長者子之言西方也上方之上
云何開士對曰最上一乘不可思議悟則頓悟悟無
所悟得則永得得無所得空則真空空無所空此廣
長舌所不能談正法眼所不能睨菩提心所不能測
以是噉噉而號於人是建鳴鼓而求亡子非吾子矣
余應曰善顏氏若亡若虛老氏若虛若愚恢恢乎其

有容矣釋氏滋大直以一芥而納須彌觀自在有言
無智無得是將不存一芥何有須彌長者子能作如
是觀吾願以爲教父

太函集卷之六

太函集卷之七

新都汪道昆伯玉著

序九首

送開府孫公進御史中丞鎮蜀序

古者天子使其大夫出監方國圻以內則專制之我
國家並建兩都懸衡南北留都則天造首善廣輪幾
半域中大江以南府財賦藪人文陵廟百官具在
顧舉高皇帝之所專制者悉屬之開府重臣其任
專矣諸方伯部內開府率循資遞遷其在留都非臺
省不遣專且重也頃年島夷大入太上耽耽而急

異材不惟求舊惟其才迄今未改開府孫公之蒞南
國蓋由主爵起家卽藉重資大都以材取重邇者內
臺虛席廷議請召開府還上睠舊邦不報乃今求
代蜀者詔以開府進中丞行列郡諸父老若都人
士鄉大夫始聞而愠旣而夷終則帖帖喜也諸父老
之言曰吾儕寓公土宇故沃而饒比年水溢歲侵磬
罄者且望屋而食狀上縣官出內帑賑之我公顧
復拊循孳孳務廣德意卽老羸無菜色丁壯無戎心
公之爲也吳故重賦閭右率不受征逋負相沿無所
問屬催科令下民間適值無年法當坐者若干曹且

在大辟公寬薄責苟可追死輒曲貸而生之大司農
成賦萬邦奉 詔履畝更籍程督日急視還報淹速
而殿最庶司南中多廣谷大川且以賦甲天下公以
便宜授羣吏不旬月而受成江介伏戎將號澤稱變
公殲戎首其次掠治之其次跡捕之境内遂定非公
在事吾儕不死歲則死兵後之人不死厲階則死罪
畧凡吾什郡二州五十縣何可一日去公夫以南國
視蜀亦猶冠冕之視衣裳心膂之視手足顧內臺不
能徙南國不能留而蜀得之故愠都人士之言曰故
事天官屬出就列卿率得久居內 今上獨念冢宰

帥其屬以均邦國內而不出非所謂均卽主爵在列
卿亦以開府適出一視平施以示官常公在留都猶
之乎圻內耳蜀爲西南重鎮獨以采阻孤懸假公之
重坐鎮之邦國於是乎均矣頃少宰張公由蜀召
入我公儼然代之當寧西顧方勤異日者又將求
少宰於蜀卽蜀之厚非公之薄也故夷鄉大夫之言
曰人主深居九重明見萬里之外雖竭目力惡能以
察察爲明遠而不忘卽坐照有餘力矣周之盛王乃
不忘遠倡九牧阜兆民率用此與雖鞭之長不及馬
腹蓋言舉遠之難也彼已回面內嚮喁喁而待下流

幸公一行睹威儀而奉聲教卽敝僕夫煩扞圉奚恤哉下齊衡而元服益莊四體舒而泰宇滋定舉遠猶之乎篤近也蜀自文翁始興文教迄於忠武亦且以嚴治之顧其地沃饒其民揖讓其人文斌斌盛矣公以治南國者治蜀卽萬里無留行邇可遠在茲信矣吾黨所爲咕咕喜也五郡大夫居上游邇不佞則以不佞從鄉大夫後將徵一言以質倌人不佞旣聞輿誦而有慨于中于是俯而思仰而歎也嗟乎諸父老爲南國謀則愠都人士爲蜀謀則夷鄉大夫善爲天下謀則聚族而喜有以也公起故絳始奉三尺理興

都既撫留都今則駕成都矣其駕愈遠其勞愈張自
今都六卿躋三事依日月之際以慮四方明析秋毫
不啻觀火公以此謀國焉往而不可哉不佞產三天
子都幸得以家食而渥周澤誠願終身草莽習聞入
告嘉謀毋使人謂子誠南人知有南國而已五郡大
夫同聲應曰司馬之言是也籍之

太守高使君上計序

今天下承平餘二百年吏襲恬嬉民安在宥至治已
主上秉沖聖撫盈成虛已任賢相與保泰直慮法滋
弛則日削民滋玩則日偷利在更張務明作以成惇

大于是弊吏治維士風重以加惠元元與海內休息
乃稽典故定章程慎考成罰不共命課逋負趣轉輸
減供需定經界均夫家毋倖免停厨傳毋專行他若
謹干掇坐覆匿傲官邪必盡法詢民隱必盡情鯁鯁
然無細不矜無深不察治具於是乎畢張矣庶司承
上德意將順不違抑或過於張皇求治太急利不盈
眦病亦隨之非始願所及也新都爲 高皇帝甸服
土瘠民勞四塞三鄣曾不足以當一大縣雖世守文
獻其民易爭比年賴諸循良善以躬化本末之業不
廢猶及息肩辛巳季冬高使君由尚書郎出守不佞

不獲從鄉先生旅見最後而拜先施於門使君巖巖
乎若泰山泱泱乎若東海蓋東國產也幸而問政不
佞無能贊一辭使君拊身語曰某所以來願持安靜
以佐百姓不佞謝曰君侯之及此言也境內幸哉新
都僻居一隅疆事寢矣非有六傳之驛騷兵革之擾
催科之不給也獨囂訟未熄而褊心盛氣殆不可磯
縣官十年更籍百年更經一旦而奉兩端舉國皇皇
從事緩則慢命急則無章治絲而棼違言叢起君侯
鎮以安靜躁者易平力而行之庶幾不棼而治矣縣
大夫先使君至壹稟成法而代有終居頃之郡中大

治列邑諸大夫皆曰使君之蒞列邑朞月于茲一急
足不及亭一赫蹏不及市惡聲不及下吏苛禮不及
上交使吾儕不隕官常可幸無罪則使君以也其爲
士者則曰君侯以鄉三物厲多士重經術而程督之
徐不甘疾不苦乃今與計偕者視近歲居多則君侯
以也其爲衆庶者則又曰所部嚴疆理而急程期檄
者比日至偵者中日至更定者挾日至雖有敏者惡
能獨神君侯面命陳令君劑緩急而爲之次民間以
次應命毋或愆期且也訟言盈庭莫可適主要之辟
者什七衷者十三君侯舍其辟聽其衷不批頰退矣

使吾民幸得及於寬政寔惟君侯日者使君又言某于故守徐公爲同籍郡中第故守獨多徐公某雅聞徐公材固多暇退食輒讀書終日以爲常某自旦及昏非窮日力不辦卽降材殊矣何至相懸不佞竊以徐公在事四年會逢其暇恢恢游刃何不可哉乃今不旬月而授數十百年之成亟之亟者也庶官微政庶民徹業蓐食露宿總已以聽君侯若在大軌適當其族藉令無厚入有間惡能砉然立解乎故必智周而後能使之安力至而後能使之靜居簡行簡何以臨民君侯任其勞境内享其佚此安靜之所由來也

使君且上計縣大夫當從先期而就不佞謀使君行
矣有如 當展而問諸屬邑二千石何以得民和某
絀於辭其何以對諗使君者莫辨於司馬願述司馬
之言不佞避席曰主臣不佞不能效王先生不知所
對無已則籍疇昔之言以質使君縣大夫唯唯

送黃文學遷成均序

往余列執戟善故大司成習聞其程博士家言獨多
閩士則以吳越更霸久矣閩其將先二國鳴余志其
言不忘迄今信矣莆表閩海黃氏世受尚書及補父
以進士起家受命王母而家不造而大父以草昧終

曾大父尋棄岳州鬱鬱老牖下孺子幸而接武寧徐
母趨第遜有司請受功令於是出爲明都文學讀禮
畢乃補新都適余居廬補父紹介上謁袞始三尺襁
九死而祗一生明公再造我閩余小子肉骨滋甚稍
長聞諸父老誦明公之伐心竊竊德之旣從鄉先正
誦明公文愈益嚮往乃今幸挂一職從事禮樂詩書
袞則安能請得西面就正于時余病毀甚五及門而
謝二參無何補父以聘入黔典試事歸而部檄且至
進國子先生補父申請如初幸得終教同曹三文學
帥群弟子旅進而亟請曰古之贈者于是乎言國子

先生望此久矣且乞言則太學事明公毋辭嗟乎自
余卽次禮在不言卽言之宜無當于補父補父閤之
良也弱冠先鳴都人士沾沾負輪囷而畔繩墨補父
正容而悟莫不歸心新都猶之乎明都歷試吳越無
闕矣太學亦猶之乎文學也於補父何有哉夫仕者
藉手經術不啻陳芻狗而棄之芻狗旣陳猶在尸祝
此補父之所爲汲汲者也儒家者言道德尚矣次者
經術次者詞章當世沿有宋而損益之壹稟於經術
徒以語道德者周折不越乎規矩得當則倒行而逆
施語詞章者抒觚觥而挾風雲槩諸躬行則自廢要

以明經取士庶幾近之顧經術務稱先王非異軌也
本之爲道德溢之爲詞章三者同條而共貫以故漢
程吏治悉第經術爲差卽當世有名公卿若賢良百
執事名實純粹有裨社稷生民皆由此塗出也乃今
恬愉熙洽耳目日新頃者二三主盟宣言文勝民治
皆厥職此之由海內雷同具曰勝矣藉令覆太常之
牘則經藝蔚起有若七襄化腐爲奇抉奇爲巧精若
刺櫛細若雕蟲月化日遷心愉目奪故曰勝也一旦
而詰其本業則句不能章章不能卷彼其七襄者僅
僅乎折揚一聲耳進而詰之以三墳五典千不一能

詰之以諸子百家百不一能近而詰之以六籍能者
什不得三詰之以歷代興亡當世沿革能者什不得
二猥云文勝則末伎勝耳文胡勝哉比年黜奇袤敦
本實務削雕爲朴毋使滋蔓甚者暗道德楷詞章胡
爲乎急無用之辨工無能之辭而爲此詆詆也夫束
之以經術則如此禁之以道德詞章則如彼修古之
士將安所從出哉有虞之教胄子則以典樂命夔三
王因之成均之教樂爲政以分職則爲大司樂以命
官則爲大司成其屬則大樂正小樂正大胥小胥大
師小師籥師箎師承其教則樂德樂語樂舞其德則

中和祗庸孝友其徒則王太子王子羣后之太子卿大夫元士之適子與凡民之俊選皆造焉蓋拓有虞而廣之駸駸悉備夔之命曰詩言志歌永言聲依永律和聲九成而神人和矣太師之教六詩而以六德爲之本六律爲之聲六變而天神降八變而地示出九變而人鬼禮矣故曰興于詩成于樂記有之矣詩也歌也舞也三者必本於心而後樂從之漢儒有言心和則氣和氣和則形和而後天地之和應由斯以談樂正之四教一經術也補父受書先世宜深於夔乃今嫻于聲詩宜深於樂 聖天子方以禮樂治天

下職論思而贊制作者吳越閩海多老成人補父遞
游明都新都皆執政舊國知補父習矣夫四方之樂
具在旄人胥獨鼓南蓋南方之樂也虞帝爲五絃之
奏則歌南風無亦天子所嚮方正氣成象而和樂興
矣古者以政爲教故有中和樂章補父以身教之群
弟子之講德者喁喁如也兩都人士必有同聲茲行
也第操南音而鼓之庶幾乎可與道古矣

新都太守濟南高公奏最序

有虞岳牧分職夷於九官周室列內諸侯不屬方伯
蓋其重也 高皇帝置列郡圻以外則藩臬總之圻

內專達新都方六百里蓋磽确之壤采阻之區顧當
南面而輔上都非良二千石不治自不佞書名問史
迄杖于卿閣六十年而得三良皆股肱守也三良者其
一會稽其一雲杜今茲在事則濟南高公歲次甲申
公當奏最其秋八月歲乃大穰賈粟一鍾糶三之一
無慮菽麥瓜蔬果蓏其賈悉平蓋自有生以來六十
年而一覲者也新都故爲瘠土巖谷數倍土田無陂
池澤藪之饒惟水庸爲搢搢卽力田終歲贏餘幾何
適公政成逢年無兩天人交與不自我先其斯得天
之天良莫良於此矣于時縣大夫具在則以次畢獻

其成惟茲歲事之登爲順成第一公之課最爲治平
第一適然然乎哉境內席公寵靈幸得及于露積出
入作息寧無擊壤者若而人乎有之是可以觀俗觀
政矣不佞家食浸久乃今而始知田之害三三而一
有則竄鹵莽者不力不力害耕污萊者不蠲不蠲害
殖欲速者不達不達害成三害去則良農不易地而
登三事脩則良二千石不易國而治自公之蒞吾郡
也日出視事肝食不遑靡牘不親靡成不聽蓋矻矻
乎力矣民多違言則保其衷宥其辟無繁苛民多囂
訟則左其辟右其衷無枉撓或習守勝則衷以衷終

辟以辟終無改度或務借資則高其手必曰某也束
下其手必曰某也辟無渝成其視良若苗視無良若
莠斤斤乎其蠲矣夫既備兩造察五辭悉聰明致忠
愛宜無不盡藉令負百曲而徼一直猶將虛已而聽
之理爲之鑒情爲之衡黜成心爲太虛應衆叩爲空
谷寧以淵魚而坐不察無寧以株累而蹈不經故罟
不數而周版不更而定此之爲達非速成矣脩此三
者亦越三年蓋登而升升而平治功之成視農功等
且也厲七校課諸生飭學宮協星紀凡所以殖嘉生
而薦明德惟日孳孳由是而大有年固其所也公始

下車宣言政在安靜乃今以靜則正以用則和和氣
致祥農祥於是乎長發矣適然然乎哉諸父老言會稽
之政利用休其卒也休而不廢雲杜之政利用作其卒
也作而不勤要以直道而行民心猶昔顧惟經國之
費日縮經野之令日申猶之穠黍稌施耒耜互舉雖
有敏者殆難爲功公出兩難而奏庶功良之良者也
古者登場則省穡事滌場則息田夫蓋歲至而畲日
至而穫一張一弛王道則然會稽雲杜胥三年而邇
遷皆是物也公上程書以歲計則歲至矣卽所部汲
汲良二千石靳爲新都留而當寧汲汲新都不啻

潁川渤海 譽命且與簡書並至畱寧詎能乎縣大
夫相目愀然而起曰戴匡六星繫于北斗伶倫六律
稟於黃鍾吾儕惟公是依何以異此脫令公以陟明
而舍境內雖有粟吾儕焉食邪不佞敬對曰無然都
人士依公猶六君子耳公未入境望之如雲旣入望
之如雨政之未成也望之如望歲政成而民足怙也
望之如坻如京及其輸之大農薦之玉食猥云有廩
三百寧復能爲境內饗哉儻然粒我烝民波及故郡
使不佞得含餽鼓腹以樂餘年幸矣

送龍相君考績序

龍氏甲楚世家則君御起公車而趨乘結髮理郡郡
中稱平園土虛無人日挾筴攻古昔乃構白榆社據
北斗城入社七人謬長不佞君御爲宰丁元甫奉楚
前茅郭次甫隱焦山歲一至居守則吾家二仲洎潘
景升諸賓客自四方來擇可者延之入君御身下不
佞左二甫右二生旬月有程歲時有會程則諤諤會
則于于從人如流虛已如壑其取益無方矣居郡三
載理當上程書所部謂理不可一日去新都請留郡
會天官建議非守土必面質成理當行都人士快快
理則以上申令修有虞法其孰敢不共人臣以王

事爲獨勞不遑父母之謂也家大人索居衛母氏繫
少子畱新都乃今奉母氏與偕在此行也臣子之願
兼得矣勞之謂何于時太君首塗期君後七日乃發
部使者檄至屬理周行部中君坐愆期通昔不寐者
旬有五旣畢事吾黨祖之天門元甫謂贈者宜有言
是在長者古者非彊不仕卽老成賢於典刑比年蚤
貴者什二三率發硲而族立解天之降才殊矣年數
云乎哉乃若趣時如終軍經國如賈傳豈不足多一
以剝而輕一以激而憤輕則失已憤則失君其器則
然卽二缶滋惑矣君御承世美席名高藉令挾寵靈

矜意氣求自快於一逞惡在其不勝顧獨恢乎其有
容淵乎其不可測邴乎其勿喜蕩乎其無所增忮度
汪汪不可爲量則楚產同矣此之謂有道者之器終
賈何爲人亦有言仕優則學夫士孳孳佔俾童習白
紛幸而中年得之去崦嵫咫尺耳惟茲蚤貴舍故業
而稱先王若出日東隅幸有餘力第未遑染指輒自
以爲屬饜瑕則稱人瑜則稱已弁行而亟稅屨孰爲
前途行百里者半五十殆非虛語且也鬻熊南面文
考靈光其爲早服一也一則闕而不傳一則傳而不
永抑亦殊器非與獨觀大指厥有隆中出師數十百

言庶幾三代其斯爲王佐之器也是皆以楚材著君
御於是乎得師器有不同師在此不在彼矣二仲謂
理君在吏言吏在儒言儒書言永和詩言大曆殆將
不器如之何器之不佞則以爲不然夫夫器也以勺
受者爲栴櫨以升受者爲尊甒斗則鐘釜石則坻京
若雲夢若洞庭其受滋大莫非器也人知器之爲器
庸詎知不器之爲大器邪元甫曰然方今器使羣材
遞爲之品器猶品也理當面謁 天子臨軒而召見
之上當以國器器理君其品上上夫百聞不如一見
君其無來二仲謂三載考績三載陟明其法未改都

人士急君尤甚君固當來不佞莞然笑曰謂君無來則元父過謂君當來則二仲過如將解二家之難無若置諸兩忘 國家用人惟其所重內重則君無來外重則君當來兼所重則兼所利矣無來則大者九列小者四方當來則大者郡小者社亦各嚮其利矣君何容心焉會故太史李本寧至自郢中入社與行會謂楚方不競非司馬得楚久安得聞張楚之言遂書諸冊

送監司周使君進江西叅政序

監司周使君代程使君並起家閩海進而叅知政事

並分部九江都人士始聞而欣欣旣而怏怏欣欣者
則以徙官近地猶可波及舊疆譬之赤子依於其隣
猶故宇也怏怏者則以邦畿地重務在得人庶司律
可遞進秩可遞加仍視事如故迄今有行之者主爵
何不用也於時列郡守相相率而祖使君乃先乞言
於不佞道昆以代奉車之役則以不佞居閩居楚故
嘗以士譽民譽得使君乃今家食則又以終始相周
旋言有徵矣夫江漢朝宗於海舊都衡之九江則吭
秋浦則喉雷六郡而數五陵天塹足當百二往者聚
徒金穴三薄新都戎伏於荏士譁於堞乃復監司治

秋浦據上游而綱紀之二三大夫迭爲部署久之則
疆圉寧閭伍輯行旅安矣其後或以束薪用事不樂
爲標枝法令滋章殆難爲下程使君壹與境內休息
去泰甚罷紛更爽然蠲熱就涼息勞卽佚其民易德
也及周使君之繼治也率以同道而興藉令得涼忘
熱得佚忘勞民無得而悅矣顧宇下德使君愈甚抑
遵何德哉無亦本之以憺怛居之以寬平酌之以規
隨保之以寧壹猶未也持之以悠久和之以從容與
其得民終不以恬愉而易在宥若星重暉若海重潤
不待晻而爲麗不待涸而爲仁此非可以章程襲聲

色蒙也都人士言閩故樂土饒於江南頃創島夷百
戰底定未及稅甲皇皇求一息肩兩使君於其身親
歷之坐筴審矣醫以折肱而良射以善息而中不殆
此兩使君所同也其始遷也一自尚書郎一自二千
石守在四境於民社親由是主臬以閩部中不煩而
治此使君事也不佞直以爲末節是奚足以多使君
吾道旣南閩爲海濱鄒魯諸先正距多門而守戶說
居然聖人之徒粵自三五以來義黃尚矣後之尸祝
者具曰黃帝孔丘仲尼師柱下而稱猶龍一何尊也
無爲而民自化好靜而民自正此非老氏之言蓋術

聖人之言自羲皇以至禹湯率用是道成周以禮樂
爲治儒教始倡漢儒以訓詁鳴稟經術而紉黃老自
漢而下治莫盛於孝文雖武帝欲效唐虞卒以暴施
耗海內污隆之辯不待智者而明明此而南面則爲
唐虞恭已而無爲臨下以簡是已其在聖門雍也可
使殆庶幾乎先正誦法孔子而倍之卑漢儒而襲其
說猥云伐異要亦一家之言使君則古昔稱先王徵
諸庶民見諸行事不佞嘗爲使君誦語具光岳篇由
前則爲帝臣爲國士由後則爲振古爲閔儒彼其海
邦澤國出入有聞直一呖耳九江保界吳楚表裏江

湖下若建瓴東若歛衽地至重也故事監大夫出行
部率自其行臬之營事者登之 主上耽耽而睠舊
都儲異材以備緩急王祭先河而後海蓋貴其源先
配林而後泰山蓋貴其漸使君之就九江也殆將爲
海岱地耶列郡守相聞不佞之言若有當也使君不
煩吏治大有造於庶司儻藉 高皇帝之靈卒以使
君賚旬服非直百姓之德也吾黨其再造乎哉相與
日幾幾望之適有天幸未可知也

送首座璋公還鷲峰序

余主肇林建無遮會語具記中余二仲從都人士爲

方外遊習璋公名德旣爲期會則先發使持幣逆璋
公于鷲峰公方舉檢藏之期迫未暇旣而回面南向
望三天子都自昔大士現宰官身掘起南中羽翼龍
象今司馬其屬也且名之再吾何敢辭尋操杖鉢與
節公俱以良月至于時境內外比丘具在凡四十有
八人余帥四衆奉席堂皇公爲上首先是法衆濟濟
若發寶藏而布檀林公據高坐出牟尼珠照三乘徹
十地有衆瞻仰始則灑然異之旣則疑終則皈依恐
後于其行也莫不戀戀堅爲留行蓋公居南國三十
年所居輒爲萬行首重以嫻於佛事三業同歸傾耳

樂聞有如天籟何所取異異希有也衆與之處若大海之爲百谷王混然其無方廓然其無量衆動不逆于目衆言不逆于耳是非不逆于心豈其杜德機邪吾見其槁木吾見其濕灰盖示之以太莫而無所示也及其攝伏野狐作獅子吼胡然而我慢胡然而悠悠胡然而僂胡然而無特操要以直必中繩平必中準疾徐必中鑾和浸久則爲方廣爲圓融無庸規矩矣就而親之也如日之冬如月之秋寥寥乎懼其不畱湯湯乎懼其不住舍教父其無如矣昔者尼父稱聖無如西極化人象教東流直土苴耳顧學道者求

之愈下其得愈真由土苴以盡虛空其致一也公之
爲萬行首者其在斯乎公生延平幼師無窮祝髮大
施寺旣游寧化禮正宗尋徇寧都巖棲疏食且三歲
旣入曹溪禮六祖入西粵禮無量如來乃登南岳師
碧谿居七寶寺尋授衣鉢得寧濟正宗是爲高峰和
尚十有一世法孫也乃始聚徒說法居鹿苑菴東游
秣陵師守愚究聖諦密義廣陵李文定屬介弟叅軍
若張司諫延之居興教寺聚徒說法如初會陳司禮
築文殊菴公爲主尚司禮帥諸中貴人請居鷲峰寺
聚徒說法如初公旣行余帥二仲送之林外把臂而

語曰公三住猶三觀也孰爲空孰爲假孰爲中邪公笑曰三觀一心我無心也無心則無觀無觀則無空無假無中司馬以三有爲住吾以三無爲住住而無住吾心始生生而無生其斯以爲常住矣余以其言若有合也乃拾貝多葉書之

贈潘景升北游序

都人士代興者吾嘗以錐末得景升景升結客而游游將害業業在博士尚安事游第負一笈踞三山抱机終年焚舟借一儻然得當羔雉委質尚方得志而游游未晚也景升敬諾宿春糧而謁行及之庠林鑒

東家之子朞月不發明年試胄子殿景升旣歸而慚
自傷吾何以面司馬余謂景升勉矣毋以厲揭爲浮
沉子好遊觀第務其大者耳蝌蚪游于勺水卽溟滓
何加海運鷗鵬六月一息不自知其洋洋也彼其涸
轍之枯耳胡然以天帝饗之漢臣之賦諸都鉅麗極
矣我 文皇帝建都北極展恒嶽而鏡滄溟庭蒿屏
衡左右泰華三關捍其北萬國覲其南自昔建置以
來歷年千計三五而下未之前聞由江淮達河濟經
碣石入堯封以此命游則大游也其間通門廣路清
廟明堂煌煌上都亡論巳于時四輔在朝羣材在列

閔儒在幄良將在邊下之則郭樂荆高登臺蔽市林
林總總何可勝原至若脩成合歡凜不可睨要以導
者搖狄卑則狹斜燕婉便娟日不及瞬觀光上國則
大觀也吾子寧有意乎客言景升一寓目而目成如
此乎其蠱之易也藉令二八通進謂多蠱何余距客
言景升非斗筭器也以一嚮而投枵腹腹則果然八
珍並陳四顧不能一御此多寡廣狹之辨也彼姝者
子何啻什百東家環而蠱之焉得人人任也饜而自
廢其謀必更雖有夷光無庸屬目故得一國色孰如
得一國士爲賢得一賢豪孰如得一作者得一班揚

鮑謝孰如得一賈生得一持文墨議論之臣孰如得
一名世之數者上都其數也扶搖九萬下視蒼蒼其
斯爲天游景升勉矣

送郡太守高公入覲序

自有虞輯瑞以朝諸侯厥有敷奏漢徵列郡上計亦
往往庭詰之 今制計吏三歲一朝時有名對不違
咫尺慶讓遂行我 國家軼漢而躋虞周率用此道
濟南高公守吾郡不啻三年昔歲癸未入朝考上上
明年當再覲先期戒行郡司馬干公司農胡公司理
龍公屏干旄而過不佞則以是夏不雨 主上步禱

南郊名諭四輔九卿討守令失政于時辟卽主者大
小有差獻歲來朝海內守臣具在抑或陟明而賜之
問宜及新都守公且行其何以對竊惟對揚君命其
率有二三不同各以其道宜直對則爲無隱宜正
對則爲勿欺宜辭讓而對則爲不伐今茲之役凡以
計功舍曰程功不伐得矣北海之對孝武南陽之對
光武庶幾近之一辨諸心一辨諸耳漢史誦其言勿
絕守公長者宜必有長者之言固當先得我心無用
忖度爲也諸相君謂不佞起三禮其善爲守公致辭
不佞主臣請對以臆有如 上問守新都故患盜疆

事通興乃今外寧而內無憂守何以故其將對曰臣待罪嚴郡無所建明自臣瀚入官部署軍旅由是而嚴踐更明訓練夷盜藪絕姦萌外備不虞內彌不逞可幸無郤要以外戶不閉則上明威非臣瀚所敢知臣復何預有如上問守新都甬量粟而谷量人物產故廉不足以共歲之飭比年迄無逋負守以者何其將對曰郡故土瘠民勞喁喁仰給於外天閔黔首歲再大穰自臣邦彥入官農功滋起催科緩急時則不愆民用小康庶得及于寬政要以地予之利天子之時惟上寵靈非臣邦彥一手一足之烈也臣

幸而遭罰又何與焉有如上問守都人以健訟聞
乃今去肺石者五之三則又何以其將對曰故俗斤
斤守勝自用其愚天牖民衷畫地而耻不人物極則
反理有固然自臣膺入官循理無害脫有失當輒爲
平反久之廷中稱平違言不至本之主德磅礴民
協于中非直臣膺能臣復何預諸相君避席曰守公
領郡居劇最課居先境內臥犬生鼈抱關寢柝四封
露積民以不爭亡論邑里夫家周澤渥矣二三子無
能爲役幸載後車奉公前茅庶無顛越公不自居其
有退然以是爲二三子張猥云有曾無心寧詎掠美

重以民功不可勝紀請問更端有如 上問守頻年
南北水旱歲用侵新都一秉不足以當二縉百年僅
見守良矣何脩而得天且也新都以壤地絜三吳儉
於一縣彼中人文尚矣此在鴈行今歲舉士滋多又
何修而得士夫是善政善教守臣職之對者云何焉
得人人讓也不佞否否人臣壹德以尊天子言無二
三百問一辭寧復有異其將對曰 上之主德格天
下之躬化作人政教之主也卽俛得一善狀則諸叅
佐之勸相諸令長之拊循諸師帥之儀刑諸父老之
勤勞諸儒生之進取也臣奉職無狀謂天人何諸相

君灑然曰果若所言加於三讓一等矣夫人各舉其職守臣何所事事哉不佞笑曰嘻奉君之令分職而布之民則守臣事大將職在旗鼓手不稱兵於是而矢者矢戈者戈步伐唯命及其俘馘而效之軍正將居首功大匠執引引繩踟躕四顧于是鋸者鋸斤者斤卒之課工匠受上賞守臣亦猶是也假令責大將以擊刺責大匠以榱題眇乎小矣諸相君乃領不佞退以不佞之言白守公公喜曰時奉教之日深知我者孰如司馬行矣屬卒史籍之

太函集卷之七